

Transkription von Urkunde SWN 1365a

Ort, Datierung: Schwerin, 1365-05-31

Signatur: Landeshauptarchiv Schwerin, Rep. 1, Gutsurkunden, Stavenow 2

Inhalt: Gebrüder Bosel: Gutsurkunde

Wy kersten Ridder vnd hannes brodere vnd hen(n)ingh ere veddere knechte alle ghe heten Bosel be ken(n)en vnd tūghen open/bare in dessem breue dat wy vnd vse eruen dat hus to Stauenowe mid al den dorpen vnd gūde dat dar tū licht dar it / vs ok greue otto van zwerin dem god gnade mede vor pandet hadde . hebben entfanghen tū enem rechten lene van dem hoch/ghebornen voersten vsem gnedighen heren hern Alberte . hertoghen tū mekelenborgh de greue is tū zwerin vnd here tū / Stargarden vnd tū Rostok vnd van sinen eruen . vnd scholen vs number noch mid dem slote noch mid dem gude vorbeno/met tū ienighen anderen heren setten edder van iemande anders entfaen. men wý . vnd vse eruen scholen . vnd willen darmede / truweliken vnd tū ewighen tiden tū des vorbenomeden hertoghen albertes vnd siner eruen denste sitten . vnd en dar af denen vnd / doen also truwe bederue lude eren rechten heren tū rechte doen scholen . Des schole wi vortmer van staden an vort buwen dat / vorben(omede) hūs als wý best kūnen vnd dat sulue hūs schal alle ¹ tid ere opene slod wesen tū al eren nuden vnd noden . Vnd / hebben ghe gheuen . vnd gheuen mid dessem breue . vor vs vnd al vse eruen vsem vorbenom(ed)en heren . herr alberte . hertoghen / tū mekelenborgh vnd sinen eruen . des gantze macht dat se vs dat vorbenom(ede) hūs vnd gūd af kopen moghen wan se willen / dat si ouer kord , edder ouer langh . vor also vele gheldes als twe erer man de se dar tū setten scholen , vnd twe vser / vrūnd de wi dar tū setten scholen spreken dat en dunket redelik wesen vnd dat spreken , vnd ok de losinghe schole wi , vnd / vse vrūnd de wy dar tū setten enbouen redelicheyte mid nichte vor teen mer wi scholen dat ghensliken vnd al vt holden / sunder allerleye argelist . vnd wes de vere spreken dat se vs dar vore gheuen scholen . dat scholen se vs gheuen in ener / stede , dar wý dat brukliken vnd vnentberliken entfaen moghen . vnd se scholen vs de beredynghe al vt to dem besten / keren . vnd so schole wy vnd vse eruen en edder eren eruen dat vorbenom(ede) hūs , dorpe vnd gūd sunder ienigherleye vor/togherýnghe brukliken antworten vnd scholen en ok dat al vt to dem besten keren Alle desse dingh stede vnd vast / tū holdende loue wi kersten Ridder hannes vnd hen(n)ingh knechte vorbenom(ede) . vor vs vnd vor alle vse eruen vsem vorbenom(ed)en / heren Hertoghen alberte vnd sinen eruen bi truwen vnd bi vsen eren in dessem breue . dar wý tū tughe vse ingheseghele / an ghehenght hebben De gheuen vnd screuen is tū zwerin na godes Bord drutteýnhundert iar in dem vif vnd sestighsten / iare des hillighen auendes tū pingsten /

¹ im Original zweites l durch Knick in der Urkunde nicht erkennbar